

E soltero eterno...

Etty Toppenberg

"Den bida di un artista, mas bo alegre hende,
mas bo ta isola bo mes"

Tur su pakico tin su pasobra; y esey ta loke Xclusivo Magazine a bai busca cu nos entrevista cu Etty Toppenberg. Loke nos a haya sa ta cu e pakico di su solteria largo ta algo mas complica di loke por mustra. Nos a topa cu e compositor, guitarista y cantante den un di su lugarnan favorito, Flor di Oriente, unda regularmente e ta pasa atardinan ta combersa cu su amigonan di semper. Aki el a comparti masha hopi di su sentimentonan pa cu e institucion di matrimonio y kico ta loke e ta lamenta mas den su bida.

Pa decadanan largo e musico di vocacion y docente di profesion, a ameniza y entretene publico local y internacional na un cantidad di ocasion, sin embargo ta precisamente e dedicacion aki na musica ta loke tambe a kite di subi e boto matrimonial.

Aunke for di hoben e tabatin e toke magico di 'atraccion' serca hendenan di sexo opuesto, e tabata consciente cu su carera musical lo trece cune hopi obstaculo pa hiba un relacion formal y mas ainda un bida di casa. Biahamento constante, oranan lat di presentacion y e atencion cu semper el a keda haya di hende muhernan, lo a bira un carga pisa pa cualkier pareha por hiba.

Orguyoso di a nace y lanta den bario di Companashi, Etty a conta cu el a lanta den un famia y bicindario caminda tabatin hopi amor; amor di mayornan, di rumannan, di amigonan, etc. Esaki hunto cu otro balornan moral a haci di dje, awe un hende cu respet pa otro, pero cu ta exige respet tambe. Banda di esey e ta un persona religioso cu ta lanta tur mainta tempran pa bai na Kapel di Alto Vista y resa na Mama Maria. **Mi ta kere cu pa yega na Dios bo tin cu pasa via Maria.**

E creencia aki ta basa den e su mesun amor y devocion pa su mama, Sra. Petra Toppenberg pa kende el a percura y cuida te su partida den su nobenta y un aña. Dia cu su tata a fayece el a priminti su mama cu e lo compaña pa semper y Etty sa cu esey tambe a hunga rol cu e no a dedica su mes completamente na un otro hende muher. Apesar cu te dia di awe e ta idolatra su defunto Tata, tambe e ta reconoce cu su progenitor tabata gusta diverti, por ta un poco di mas, pa e smak di su tambe defunto Mama. E situacion aki a duna Etty un bista hopi cla di kico ta necesario pa hiba un bida den pareha cu ta armonioso y satisfactorio pa ambos persona. Esaki na su bes a hisa e 'standard' di balor y respet cu e tin pa cu e compromiso di comparti un bida hunto cu otro persona. Esaki ta loke a pone cu Etty a pensa sumamente bon prome cu pone e idea di casamento riba mesa.

DESEO CU NUNCA A CUMPLI

E unico hende na Aruba cu a yega di bai

no un, pero dos biaha pa participa den festival internacional di OTI, a conta XclusivoMagazine di su unico anhelo no cumpli.

Semper mi tabatin e necesidad 'ei', pero mi no ta conta ningun hende. Ya, bo ta biba un bida solitario. Mi tin bon amiganan si, pero semper bo ta keda cu: Mar'e mi por tabatin un yiu y mar'e mi por tabatin un famia. Pero Dios ta pone pa cos bai asina, Etty a conta cu resignacion.

Mas aleu Etty a sigura cu ta Dios tambe a pone cu nunca ningun hende muher a sali na estado di dje. Pero e tin sigur cu si esey a yega di sosode, e lo a casa cu e persona ei y biba te na morto cune ya cu nunca e lo a permiti pa su yiu no tin e figura, presencia y guia di un tata of pa riba caya hende lo mester papia riba dje, paso su tata no a cri'e.

Hende cu tin yiu no sa con un hende cu no tin yiu ta sinti, e ta conta bisando aserca cu ora e ta wak amigo y conocirnan ta gaba con nan yiu muher of yiu homber a bira docter, of reina, e ta corda cu esey ta un placer y orguyo cu e lo no tin. Den mesun rosea e ta admiti cu e ta stima, guia y respeta su sobrinonan y yiunan di miho amigonan mescos cu ta su mesun yiu nan ta. **Ora cu mi bai ya lo no tin nada mas di Etty Toppenberg.**

E MUHER IDEAL

Nos a puntra Etty si tin of tabatin un persona den su bida cu te dia di awe lo tabata esun cu cual e lo kier a comparti su bida. Rapidamente y decididamente el a contesta nos cu "No". C'un tempo si e persona ei tabata existi, pero no mas. Y sin duna mas detaye, el a expresa su deseo pa e persona aki keda secreto.

Loke si el a comparti ta e perfil di e hende muhe cu ta hala su atencion y na su parecer lo ta un bon partido. E mester ta tough, di caracter fuerte; e mester tin educacion y impresiona mi dor di con e ta haci su trabou, Etty ta splica. Pa loke ta trata fisico, el a bisa di nunca a pone hopi atencion riba esey, paso loke tin pafo y loke tin paden por ta hopi diferente di otro. **X**

